

春

秋

傳

春秋傳卷十

滋陽牛通解

昭公

元年春王正月公即位

穀梁子曰繼正即位正也其言繼正者嫌繼子野之非正也

叔孫豹會晉趙武楚公子圍齊國弱宋向戌衛齊惡陳公

子招蔡公孫歸生鄭罕虎許人曹人于虢

國弱公作國
酌齊惡公作

石惡罕虎公作軒虎

號公作渚穀作郭

尋宋之盟也不書盟不畝也公子圍亞於晉趙武而序於諸侯大夫之上兩伯之辭也招者陳侯之弟何以不稱弟曰稱弟者因事而特稱也公子者恒稱也

三月取鄆

鄆公作運

此季孫宿伐莒取鄆也其不書伐莒者何書伐莒則嫌以討賊予季孫也

夏秦伯之弟鍼出奔晉

罪秦伯也其弟云者親之也親而奔之惡也

六月丁巳邾子華卒

晉荀吳帥師敗狄于大鹵

大鹵公穀作大原

箕與交剛皆書人而此書卿帥師者將尊師衆也

秋莒去疾自齊入于莒

莒展輿出奔吳

展下公穀無輿字

去疾展輿皆繫之莒者爭國之辭也去疾繫莒明其當立也展輿繫莒明其已立也去疾曷爲不稱公子內無稟命於先君徒因齊之力以入爾其立正而立之不以其正也展輿曷爲不稱爵爲弑君者所立國人不與是以不成其爲君也

叔弓帥師疆鄆田

因莒亂也曷爲帥師而往懼不服也

葬邾悼公

冬十有一月己酉楚子麇卒

麇公穀作卷

此卒也傳以爲弑者公子圍弑麇之子而自立也孔穎達曰傳稱弑而經書卒者以疾赴也夫楚子果弑于圍聖人何難考正其弑君之罪乃隱弑而書卒其爲縱賊舍惡孰大焉陳氏曰圍弑其君赴於他國如恒辭而其臣子聽焉書卒所以誅楚之臣子聽賊之所爲也夫舍

首惡而罪楚之臣子已屬非理且弑君之罪未彰而附
同之罪從何誅之家鉉翁曰圍所弑者楚之嗣君麇之
世子如魯子般子赤之類而非弑麇也圍乘君之殞戕
其子而篡其位是亦弑也而非弑其君也當時諸國傳
聞遂以爲弑其君此椒舉之言慶封之對固有所自來
矣按左傳公子圍殺麇之二子幕及平國則家氏之說
本屬有據又傳稱葬王於郊楚人謂之郊敖夫郊敖不
成君之稱麇已立三年安得謂之不成君若以之稱麇
子則固允合以此知左傳誤也總之信傳不如信經傳

有可疑則據經以折之經書麋卒自然非弑無庸存依
違之見也

楚公子比出奔晉

辟國難也書公子比出奔則圍之殺其君之子而自立
可知也

二年春晉侯使韓起來聘

爲公卽位脩好也左氏以爲告爲政而來見非也

夏叔弓如晉

報韓起也

秋鄭殺其大夫公孫黑

稱國以殺其大夫者罪累上也黑有罪曷爲以累上之辭言之惡鄭之失政殺之已後而不以其罪也

冬公如晉至河乃復

如晉弔少姜也晉人辭公故至河而復書此以見公之動不以禮其卑且勞爲已甚矣

公羊以至河乃復爲不敢進釋公羊者以爲晉將執公穀梁又以爲公如晉而不得入惡季孫也其說皆非

季孫宿如晉

春秋傳

卷十 原公

四

空山堂

爲少姜致禭也

三年春王正月丁未滕子原卒

原公作泉

夏叔弓如滕

五月葬滕成公

爲滕來會襄公之喪報之也

秋小邾子來朝

八月大雩

冬大雨雹

北燕伯款出奔齊

爲其大夫齊而出之也其稱名何諸侯失地名燕伯奔
不復國也

四年春王正月大雨雹

雹公穀作雪

夏楚子蔡侯陳侯鄭伯許男徐子滕子頓子胡子沈子小
邾子宋世子佐淮夷會于申

楚始專會諸侯也夷主夏盟會盟之大變也淮夷不殊
會者以夷會夷別之無容別以爲與會者皆夷爾
楚人執徐子

爲其貳於吳也以夷執夷故不名

秋七月楚子蔡侯陳侯許男頓子胡子沈子淮夷伐吳
再序諸侯有不與伐者也宋華遂鄭大夫從不書略之
也

執齊慶封殺之

伐吳曷爲執慶封慶封在吳也慶封在吳則其言齊慶
封何著其爲齊賊也書執書殺明其罪之可殺也此殺
有罪也曷爲不再言楚子不與楚子以討賊也

遂滅賴

賴公穀
作厲

遂繼事也著楚之暴也伐吳滅賴書之詳而不殺者傷

中國之失伯蠻夷之爲禍烈也

九月取郕

取之於莒也公羊以爲內諱滅非也郕一滅無再滅也
冬十有二月乙卯叔孫豹卒

五年春王正月舍中軍

毀中軍也魯舊二軍襄十一年作三軍今毀中軍復二
軍之舊書之罪季氏之擅兵制也

左氏舍中軍卑公室也初作中軍三分公室而各有其
一及其舍之四分公室季氏擇二二子各一按季氏之

卑公室固不待言但以舍中軍爲四分公室攷之經文實不相合劉紹攷曰春秋書作三軍舍中軍忽作忽舍罪季氏之變亂軍制也先儒惑於左氏四分公室之說牽合曲引與經文多不相中攷襄十四年傳晉侯舍新軍緣成十三年趙旃曾將新軍至是以新軍無帥故舍之其事其文正與舍中軍同蓋三家不度國勢不量民力改作三軍至是國不能支而舍之亦猶晉之新軍無帥而舍之也左氏於舍新軍無異說而於舍中軍別生異義此不可以解經文也

楚殺其大夫屈申

曷爲稱國以殺楚子疑申之貳於吳而殺之非其罪也

公如晉

夏莒牟夷以牟婁及防茲來奔

公出而季孫納之也邑而言及者以大及小也

秋七月公至自晉

戊辰叔弓帥師敗莒師于蚡泉

蚡公作潰
穀作賁

爲受牟夷邑莒來討而又敗之魯之惡可知也

秦伯卒

不名略之也

冬楚子蔡侯陳侯許男頓子沈子徐人越人伐吳

報吳棘楸麻之役也其曰徐人越人者便文也猶臧之會吳以鄆故稱人也胡氏以爲進越者非也

六年春王正月杞伯益姑卒

葬秦景公

七月而葬僭也

夏季孫宿如晉

拜歸公且偵晉也

葬杞文公

宋華合比出奔衛

宋公用寺人柳之譖而逐華合比經以自奔爲文見國之無政也

秋九月大雩

楚薳罷帥師伐吳

三書伐吳見楚終不得志於吳也

冬叔弓如楚

以聘往也左氏以爲弔敗非也

齊侯伐北燕

納燕伯也書爵書伐師出以義也

七年春王正月暨齊平

此燕及齊平也不言燕蒙上文也齊侯伐燕納燕伯庶幾天下之大義乃受賂而與之平是棄義而黨亂臣也不書齊暨燕平而書暨齊平以求盟自燕也

按此書暨齊平左傳謂燕暨齊平穀梁以爲魯暨齊平先儒多從穀梁蓋以定十年春及齊平十一年冬及鄭平之文例之似從穀梁爲是不知平以釋怨必先有怨

隙而後借盟以平之如定七八兩年公兩侵齊齊國夏
兩伐西鄙而後十年及齊平定六年侵鄭而後十一年
及鄭平是也魯自襄二十五年齊崔杼伐我後及此已
十有四年齊魯並未有兵怨相尋之事且二十七年齊
侯使慶封來聘昭元年叔孫豹與齊國弱又同與于弔
之會其棄惡脩好已久旣無怨隙何平之有說者又謂
下文叔孫舍如齊泣盟以爲魯與齊平之驗亦猶定十
一年冬及鄭平叔還如鄭泣盟相類攷定十一年上書
及鄭平下書叔還如鄭泣盟中閒並無閒時間事相連

爲文以平與涖盟本一事也此處齊平在正月涖盟在三月且記其文在公如楚之後閒時閒事明係兩事不相蒙者與定十一年及鄭平叔還如鄭涖盟又不相合劉敞謂杜註與傳意錯傳所云齊求之者似指齊求與魯平按左氏載燕人行成齊人受賂之事本末甚明篇首齊求之也乃左氏繹解經文罪齊之旨以爲齊人欲之爾若截齊求之也爲齊與魯平下文乃紀燕齊事成何文理况燕齊之平明見他傳鄭公孫段卒在齊燕平之月罕朔殺罕魋在齊師還自燕之月以傳證傳更

自較然然則斷齊平之爲燕及齊平章灼無疑此正與
州公如曹寔來省文之例相合趙東山毛西河辨之甚
詳學春秋者守以斷疑可也

三月公如楚

楚召公也公如晉則不得不如楚也

叔孫舍如齊泣盟

舍左穀作
媯後同

爲公遠適楚結齊好也

夏四月甲辰朔日有食之

秋八月戊辰衛侯惡卒

九月公至自楚

冬十有一月癸未季孫宿卒

十有二月癸亥葬衛襄公

八年春陳侯之弟招殺陳世子偃師

鄉曰陳公子招此曰陳侯之弟招何也曰爲殺世子盡其親所以惡招也不曰殺其世子而重舉國者偃師非招之世子重君之貳也陳侯之弟殺陳之世子陳之無政可知也稱陳侯之弟又以罪陳侯也

夏四月辛丑陳侯溺卒

傳曰縊也經雖不著然書卒于殺世子之下則陳侯之
不得其死可知也

叔弓如晉

賀麇祁也

楚人執陳行人干徵師殺之

稱人以執非伯討也楚人惡公子招而殺干徵師書曰
行人罪不在行人也

陳公子畱出奔鄭

畱爲招所立復稱公子者未成君也偃曰世子畱曰公

子別嫡庶也

秋蒐于紅

蒐春田而秋興之田獵之事通爾曷爲不言公公不得與于蒐也

陳人殺其大夫公子過

此公子招殺之也其言陳人何不與招殺也且稱人以殺以見過之罪之當殺也過有罪曷爲不去其大夫從陳人稱之也招曰陳侯之弟過曰大夫別首從也

大雩

冬十月壬午楚師滅陳執陳公子招放之于越殺陳孔奭

奭公

作瑗

此討賊之師也曷爲先書滅陳惡楚子爲其志乎滅陳也招爲殺世子之賊楚則放之奭爲招黨楚則殺之直書其事而惡自見也招猶書公子不與楚討之義也奭不言大夫非其大夫也

葬陳哀公

滅國不葬此書葬如未滅之辭者存陳也此楚子葬之也不言楚子葬之者不與楚子之滅陳而葬哀公也

九年春叔弓會楚子于陳

此楚子在陳而叔弓往會之也書之惡其會楚也

許遷于夷

楚遷之也不言楚遷者許志也

夏四月陳災

災公穀
作火

陳已滅矣其言陳災何存陳也曷爲存陳不與楚之得

陳也

秋仲孫貜如齊

殷聘也

冬築郎園

冬而築時也何以書譏勦民力以事觀游爾

十年春王正月

夏齊樂施來奔

齊公作晉

爲陳鮑所逐也高彊不書非卿也

秋七月季孫意如叔弓仲孫貜帥師伐莒

意公誤作應後同

三卿並書惡其擅國也先季孫主兵也

毛奇齡曰按此時魯已舍中軍而仍用三卿者非必一卿一軍或但用上下二軍而又分正佐以領之爾叔弓

自叔肸之後非叔孫氏也胡傳失之

戊子晉侯彪卒

九月叔孫舍如晉

葬晉平公

十有二月甲子宋公成卒

成公作戌

書月不書冬闕文也

孫氏復曰此年無冬者脫也何休謂昭公取吳孟子之

年故貶之非也

十有一年春王二月叔弓如宋

公作正月

葬宋平公

夏四月丁巳楚子虔誘蔡侯般殺之于申

虔殺或作乾

般有弑君之罪楚子殺之而不以討賊予楚子者殺之不以其罪也其殺之不以其罪何楚子嘗會蔡侯于申又與伐吳矣及是利其土地以好召而殺之不得以討賊例也楚子何以稱名名者諸侯之終事蔡侯書名矣而楚子不名則嫌於以尊戮卑楚子名則是兩君相殺也且以見楚虔蔡般之罪同也書誘惡之也

楚公子棄疾帥師圍蔡

殺殷而圍其國著楚人之志乎滅蔡也

五月甲申夫人歸氏薨

昭公之母襄公之妾也

大蒐于比蒲

喪蒐非禮也

仲孫纁會邾子盟于祿禚

公作侵

喪盟亦非禮也

秋季孫意如會晉韓起齊國弱宋華亥衛北宮佗鄭罕虎

曹人杞人于厥慙

厥慙公作屈銀

謀救蔡也不書救不果救也

九月己亥葬我小君齊歸

冬十有一月丁酉楚師滅蔡執蔡世子有以歸用之

有穀作友

書師罪其用衆也書滅書執書用深著其惡也稱世子

未成君也

十有二年春齊高偃帥師納北燕伯于陽

左有款字

其言納何言納者與納也燕伯何以不名諸侯復國名

別二君也燕伯未至國都不嫌也

三月壬申鄭伯嘉卒

夏宋公使華定來聘

通嗣君也

公如晉至河乃復

晉爲莒人之愬辭公也穀梁子曰季孫不使遂乎晉也

五月葬鄭簡公

楚殺其大夫成熊

熊公作然
穀作虎

稱國以殺罪累上也其累上何君用譏也

秋七月

冬十月公子愁出奔齊

愁公
作整

爲謀去季氏懼不克而奔也稱公子哀之也

楚子伐徐

爲吳故也

晉伐鮮虞

楚滅陳蔡晉不能救而詳於事狄其以國舉罪之也

十有三年春叔弓帥師圍費

內邑言圍皆叛也費叛曷爲不書家臣叛其大夫非叛君也徐氏曰春秋國書也家臣叛家不叛國書叛則疑于國也

夏四月楚公子比自晉歸于楚弑其君虔于乾谿谿穀作溪

不書復入而言歸者明比不與弑君之謀也比在楚則

曷爲弑君于乾谿比入而虔縊則比尸其弑君之罪也

虔之弑成於棄疾倚比爲名爾比曷爲尸弑君之罪曰

倚比爲名則比爲首惡也然則比何以稱公子曰比之

志不在於篡國是以不去其屬親差於州吁無知爾

楚公子棄疾殺公子比殺公誤作弑

比有弑君之罪殺之不以討賊之辭言之者棄疾殺而

代之不與棄疾以討賊也然則曷爲不書弑其君比未

成君也比未成君則是以公子殺公子爾

李氏廉曰比若實弑君則不當仍書公子棄疾若實討賊則不當不書人比若實定爲君則不當不書其君兩書公子不書人不書其君此春秋之變文也

秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平邱

爲諸侯貳徵會以示威也於是晉伯之不振甚矣

八月甲戌同盟于平邱

書同盟于平邱者先目後凡又以見劉子與盟也

公不與盟

晉聽邾莒之愬也不諱曲在魯不能爲諱也

晉人執季孫意如以歸

稱人以執非伯討也意如有罪曷爲非伯討執之不以

其罪也

公至自會

公不與盟而與會故以會致

蔡侯廬歸于蔡

陳侯吳歸于陳

二君皆公孫也其遂稱爵何位其所固有也此滅國也
其言歸何國固其國故使若有國自歸者也曷爲不言
復歸凡言出奔而後言復歸二君未嘗去陳蔡也曷爲
不言歸自楚不與楚之滅而復之也其名者繼絕始立
別其爲何君也

冬十月葬蔡靈公

國復乃葬也

公如晉至河乃復

請季孫也晉人辭焉

吳滅州來

閒楚亂也

十有四年春意如至自晉

大夫不至執則至危之也不氏前見也

三月曹伯滕卒

夏四月

秋葬曹武公

八月莒子去疾卒

冬莒殺其公子意恢

稱國以殺而不去其族意恢爲君死難也不曰殺其大夫而曰殺其公子義不在於專殺大夫而在殺君之親也

十有五年春王正月吳子夷末卒

公作夷味

二月癸酉有事于武宮籥入叔弓卒去樂卒事

有事于宗廟大夫有變不以告叔弓卒則曷爲去樂卒事曰叔弓泣事籥入而卒于其所也籥入而卒于其所去樂卒事禮也春秋常事合禮不書此何以書爲事之變而中禮焉書之也

夏蔡朝吳出奔鄭

朝公作昭無出字

脅於無極之讒也書之者爲朝吳復蔡之人錄之也

六月丁巳朔日有食之

秋晉荀吳帥師伐鮮虞

晉不能加於楚而鮮虞是陵春秋之所貶也前以國舉君與大夫咸有貶也此書荀吳帥師者責荀吳也

冬公如晉

平邱之會故也

十有六年春齊侯伐徐

齊復貳於晉伐徐以爭伯也盟不書不足書也書爵齊侯自將也杜謬以爲別大夫之專兵是也

楚子誘戎蠻子殺之

公作戎曼

書誘書殺罪之也不名略於夷狄也

夏公至自晉

晉人止公不書諱之也踰久乃還季孫陷其君也

秋八月己亥晉侯夷卒

九月大雩

季孫意如如晉

冬十月葬晉昭公

十有七年春小邾子來朝

夏六月甲戌朔日有食之

秋邾子來朝

八月晉荀吳帥師滅陸渾之戎

公作賁渾戎
較無之字

爲其貳於楚也滅國於王畿之內貶之也

冬有星孛于大辰

孛者何彗星也大辰房心尾也大火謂之大辰何以書

爲天象記異也

楚人及吳戰于長岸

言戰不言敗勝負敵也楚書人吳書國略之也

十有八年春王三月曹伯須卒

夏五月壬午宋衛陳鄭災

四國同日而災書之爲天下記異也

六月邾人入郕

書人書入惡之也

秋葬曹平公

冬許遷于白羽

自葉遷也

十有九年春宋公伐邾

討有罪也

夏五月戊辰許世子止弑其君買

許悼公癰飲世子止之藥而卒則曷爲書弑其君止進藥而藥殺也止進藥而藥殺則曷爲加弑焉止自爲藥而君死於止之藥則是止殺君也凡殺人者有過與故臣子於君父不可過也且安知其非故也則直謂之弑君爾止奔晉不書止誠無所逃其罪猶不使與君弑而

佚賊者同文也

己卯地震

秋齊高發帥師伐莒

莒不事齊故也

冬葬許悼公

許止出奔而許人以禮葬其君故書葬

劉紹攷曰春秋弑君賊不討不書葬者以賊臣當國不以禮葬其君安得而書葬如魯隱晉靈是也若賊雖未討而奔而他出在國之臣子以禮葬之安得而不書葬

如魯桓許悼是也公羊聽止赦止之說甚爲迂謬世多從之不可不辨

二十年春王正月

夏曹公孫會自鄭出奔宋

鄭穀作夢

鄭者會之邑也其言自鄭者別於從國都而去也

按會之奔公羊氏以爲畔也不書畔者爲公子喜時之後諱也夫會誠有叛逆之罪豈以其賢者之後而諱之且子臧之節春秋不錄何爲爲其子孫諱凡大夫自其叛邑出奔者皆先書叛若宋華向宋公之弟辰是也此

書會自鄧出奔而先不書叛則非叛也胡氏引劉敞之說以爲待放夫待放三年而後出奔此自臣子之禮經書自鄧者蓋得罪而出由邑而奔爾未見其待放也總之大夫出奔於例當書傳雖不詳其故經文本自可解不必曲爲之說也

秋盜殺衛侯之兄縶

縶公穀作郵

此齊豹也曷爲書盜曰賤之也以其爲盜賊之事是亦盜賊而已矣衛侯之兄云者貴之也千乘之國不能庇其兄故稱至賤殺至貴以罪衛侯也

冬十月宋華亥向寧華定出奔陳

寧公作甯後同

三大夫同日出奔宋之無政也公子城公孫忌八子奔鄭不書但書三子者爲其入南里以叛書其甚者也

十有一月辛卯蔡侯廬卒

廬左作廬

二十有一年春王三月葬蔡平公

夏晉侯使士鞅來聘

通嗣君也

宋華亥向寧華定自陳入于宋南里以叛

公作畔

書叛罪之也孫林父入于戚而不言衛宋公之弟辰入

于蕭而不言宋此獨言宋南里何南里者宋國城內之
里人宋而居于南里則是中國而與宋君抗也是以繫
之宋以甚之也自陳陳亦有罪焉爾

秋七月壬午朔日有食之

八月乙亥叔輒卒

輒公作遄

冬蔡侯朱出奔楚

朱穀誤作東

蔡人立東國而朱愬于楚也書奔不書卒其卒于楚可

知也

公如晉至河乃復

晉以將伐鮮虞解公盡晉卿黨季氏而公不得遂于晉也

二十有二年春齊侯伐莒

宋華亥向寧華定自宋南里出奔楚

書奔譏逸賊也其言自宋南里何以其嘗據此而叛也
晉齊曹衛大夫救宋不書畏楚而討叛不力不足書也

大蒐于昌間

間公作姦

雖時必書譏三家耀兵公不得與也

夏四月乙丑天王崩

六月叔鞅如京師

葬景王

三月而葬亂故也

王室亂

何以言王室亂嫡庶並爭無主乃亂也何不言京師亂
亂在宗室不得言京師也子頽子帶之亂不書此何以
書朝猛爭立於是周有兩天子亂重於頽帶也下書王
猛子朝之事則王室之亂自見此又先書王室亂者聖
人之特筆也

毛奇齡曰春秋記事未有無事而空書其義者王室亂者義也非事也春秋魯史一遇王室之亂特變史例空書三字以示倣切所謂以宗國而憂王室也

劉子單子以王猛居于皇

其言以者何猛不能自立其出與入皆劉單之力也其稱王猛何未踰年不可以稱天王又不可以諸侯例稱子稱王繫猛從王者在喪之恒稱所以成之爲王且以別于子朝也居于皇言失京師也不言出在畿內也

秋劉子單子以王猛入于王城

虢入于王城言始得京師也入者難辭猶與子朝分國也

冬十月王子猛卒

書卒未成君也不葬不成喪也前書王猛此其稱王子猛何稱王猛所以明其當立稱王子猛從其未踰年之恒稱胡氏曰於其卒也正名爾

十有二月癸酉朔日有食之

二十有三年春王正月叔孫舍如晉

爲取邾師晉人來討也

春秋左傳卷一
癸丑叔鞅卒

晉人執我行人叔孫舍

稱行人譏執非其罪也

晉人圍郊

討子朝也稱人微之也晉師納王不書以其怠於勤王也猶晉圍郊者不沒其實也

夏六月蔡侯東國卒于楚

以如楚卒也晉卒于楚則東國之如楚可知也死非其

罪楚人與有罪焉

秋七月莒子庚與來奔

國人逐之也郊公出入不書略之也

戊辰吳敗頓胡沈蔡陳許之師于雞父胡子髡沈子逞滅

獲陳夏齧

父穀作甫逞公作榼穀作盈

不言戰從便文言敗則戰可知也不書楚楚未陳亦不與六國之從楚也頓胡沈先蔡陳許者以君與大夫爲序也胡沈二子言滅陳夏齧言獲君臣之辭也諸侯滅則書名亦以其終事爾

天王居于狄泉

此敬王也始立未三年而遽稱天王者明正也著天下之已有王也

尹氏立王子朝

立者不宜立也書尹氏惡其專也明非周人所同欲唯尹氏立之爾朝之書王子何也別嫌於他姓之朝也

八月乙未地震

冬公如晉至河有疾乃復

公穀河下有公字

如晉爲叔孫也何言乎公有疾乃復殺恥也公如晉不入者六此書有疾以明他不入之非有疾也

二十有四年春王二月丙戌仲孫獲卒

叔孫舍至自晉左穀無叔孫字

一事而再見者卒名此其書氏何為叔孫之賢別之也

夏五月乙未朔日有食之

秋八月大雩

丁酉杞伯郁釐卒郁公作釐

冬吳滅巢

翦楚與國也

葬杞平公

二十有五年春叔孫舍如宋

傳稱爲季孫逆婦春秋諱之所以正君臣之分也

夏叔詣會晉趙鞅宋樂大心衛北宮喜鄭游吉曹人邾人

滕人薛人小邾人于黃父

詣公穀作倪後同大心公作世心後同

謀王室也明年而荀躒趙鞅之師出不書無勤王之實

也

有鸛鵒來巢

鸛公作鸛

何以書記異也鸛鵒魯所無又宜穴而巢也

張氏洽曰邵子曰天下將治則天地之氣自北而南天

下將亂則天地之氣自南而北鸛鵒不踰濟而來魯豈
非自南而北之驗哉自此之後晉伯不競吳楚越迭主
夏盟馴至大亂不特昭公出奔之兆而已

秋七月上辛大雩季辛又雩

書再雩旱甚也

九月己亥公孫于齊次于陽州

執作乙亥
陽公作揚

季氏逐君而以公自孫爲文諱出奔也次于陽州待命
于齊也

齊侯唁公于野井

弔失國曰唁書唁公非與其能唁也以其無納公之實譏之也

冬十月戊辰叔孫舍卒

繼公孫而書舍卒見舍之以憂國死也

十有一月己亥宋公佐卒于曲棘

諸侯卒其封內不地此何以地爲宋公之卒于行錄之也其卒于行則何爲錄之宋公爲公故如晉以是爲憂內也

十有二月齊侯取鄆

以處公也不言處公者明年公至自齊居于鄆則處公可知也齊侯不能討意如而但取鄆以處公書取鄆以病齊侯也

二十有六年春王正月葬宋元公

三月公至自齊居于鄆

書至以其入魯境也公未嘗至齊其曰至自齊者見公之已去魯也書地者猶在外也不言入而言居使之如未失國者內辭也此與天王居于狄泉同文所以存魯君而抑亂賊也

劉紹攷曰凡諸侯在他國曰在公在楚公在乾侯是也
出在境內曰居公居于鄆是也天子雖在畿外亦曰居
天王出居于鄭是也朱子綱目書帝在房州世儒皆謂
得春秋之旨不知其誤用諸侯出在他國之文矣

夏公圍成

用齊師也不書齊師者齊侯爲義不終不足書也戰于
炊鼻不書不成戰略之亦不與成人之抗公也

秋公會齊侯莒子邾子杞伯盟于鄆陵

鄭公作割

謀納公也

公至自會居于郕

公在外何以書至存君也凡書至必繫之居郕者嫌於復國也

九月庚申楚子居卒

冬十月天王入于成周

書入幸之也于成周猶未得王都也不言劉單以之者嗣王之位已正不使二子有專制之嫌也

尹氏召伯毛伯以王子朝奔楚

於是罪人遠遁王室始靖也子朝奔楚而書三子以之

者罪三子也尹氏獨欲立子朝則其奔楚曷爲兼言召伯毛伯敬王在外四年而後入則二子爲之也

二十有七年春公如齊

公至自齊居于鄆

書至書居所以繫魯國臣民之望也

夏四月吳弑其君僚

弑君者公子光也曷爲稱國以弑遠國不以賊赴稱國以弑則其代立之君及其當國之大臣必有任其罪者以是可考而誅之爾

楚殺其大夫郤宛

郤穀作郤

此囊瓦用無極之讒殺之也其稱國以殺何君無道以令其臣故以累上之辭加之

秋晉士鞅宋樂祁犁衛北宮喜曹人邾人滕人會于扈

令戍周且謀納公也士鞅主會宋衛大夫皆利納公故名以序之三小國大夫不序者略之也

冬十月曹伯午卒

邾快來奔

書納叛人也快賤者不足錄錄之誅季氏之無君也

公如齊

求納也

公至自齊居于鄆

二十有八年春王三月葬曹悼公

公如晉次于乾侯

公不得入于晉晉之諸臣陰黨季氏故也

夏四月丙戌鄭伯寧卒

寧公作甯

六月葬鄭定公

秋七月癸巳滕子寧卒

寧公作甯

冬葬滕悼公

二十有九年春公至自乾侯居于鄆

以乾侯至不得見晉侯也屢書居于鄆聖人之汲汲于存公也

齊侯使高張來唁公

唁淺事何以書譏齊侯之不志於納公也

公如晉次于乾侯

夏四月庚子叔詣卒

秋七月

冬十月鄆潰

鄆之潰季氏爲之也季氏聞公如乾侯誘其民使潰而叛公春秋書之閔公之無託正以誅季氏也

三十年春王正月公在乾侯

其言公在乾侯何正月以存公也曷爲存公公在外也前此居于鄆歲首不書公在者公在境內也今公羈旅他國淹恤不寧春秋特書公在所以挈一國之事託首月以繫臣民之望也鄆書居乾侯書在內外之別也

夏六月庚辰晉侯去疾卒

秋八月葬晉頃公

冬十有二月吳滅徐徐子章羽奔楚

羽公作禹

書滅徐貶也國滅君奔不名此其名徐子何爲其臣吳而後奔楚也

三十有一年春王正月公在乾侯

季孫意如會晉荀躒于適歷

躒公穀作棟後同

意如逐君之賊臣晉人欲伸其伯討乃先與之爲會是以納君之事取決於季孫其無成可知也春秋書之責晉也

夏四月丁巳薛伯穀卒

晉侯使荀躒唁公于乾侯

書唁公而不書納公痛納公之無成也不言來晉地也
季孫如乾侯不書不與季孫之假辭納公絕之也

秋葬薛獻公

冬黑肱以濫來奔

肱公作弓

此邾大夫也曷爲不繫之邾脫文也以地來則書重地
兼罪外內也不書叛來奔內不言叛也

按左氏稱賤而書名重地故也夫黑肱大夫不得爲賤

春秋書名並無略賤之例卽邾快亦以賤書名又初非以地來也黑肱不繫國者明係闕文公穀二家或以爲別乎邾或以爲通邾爲國支離無當要之皆妄說也

十有二月辛亥朔日有食之

三十有二年春王正月公在乾侯

取闕

闕者魯先公寢墓之所在公因謁闕遂入之書取者志賊臣拒命公雖得魯邑猶取之於外爾

夏吳伐越

吳始用師於越也

秋七日

冬仲孫何忌會晉韓不信齊高張宋仲幾衛世叔申鄭國

參曹人莒人薛人杞人小邾人城成周

世叔穀作大叔
莒人下公有邾

婁人穀
有邾人

會不言故此其言城成周何善之也周自東遷定都王
城久矣敬王以子朝之難居於成周諸侯之大夫相帥
以城之此衰世之義猶知勤王事也曷爲不言京師言
京師則疑於王城也

十有二月己未公薨于乾侯

書地言失其所也

春秋傳卷之十終

蘭陵門人張魯文校刊